

28/04/1998

Hijrah cara atasi masalah: Mahathir

KUALA LUMPUR, Isnin - Sempena Maal Hijrah esok, Datuk Seri Dr Mahathir Mohamad meminta umat Islam di negara ini mengubah pendekatan dalam menghadapi masalah, khususnya kegawatan ekonomi yang melanda negara sekarang.

Sambil menyifatkan krisis yang melanda negara sekarang amat kecil berbanding krisis dihadapi Rasulullah di Makkah, Perdana Menteri berkata umat Islam perlu berhijrah dalam pendekatan mereka menghadapi masalah.

"Kita perlu berhijrah bukan dari negara kita ke negara lain tetapi daripada cara kita menghadapi masalah kepada cara baru."

"Jika kita perlu lebih berjimat cermat, lebih kuat bekerja, lebih sabar dan lebih sederhana dalam pendirian kita, maka kita mestilah sanggup membuat perubahan ini."

"Insya-Allah, jika kita sanggup membuat penghijrahan ini, maka perayaan Maal Hijrah bukan saja sekadar merayakan hari bersejarah ini tetapi manfaatnya kepada kita adalah lebih besar dan lebih bermakna," katanya dalam perutusan sempena Maal Hijrah 1419, hari ini.

Perdana Menteri yakin, menerusi perubahan cara itu, umat Islam akan dapat melepaskan diri daripada belenggu yang menekan negara sekarang, sekali gus berjaya mengatasi segala penindasan yang dihadapi.

Menurutnya, semua umat Islam memahami Rasulullah berhijrah untuk mengubah keadaan yang menghalang kejayaan mengembangkan Islam.

"Tetapi, kita tidak begitu mengambil berat akan maksud sebenar Sunnah Rasul dan firman Allah mengenai mengubah diri," katanya.

Beliau berkata, jika rakyat memahami maksud hijrah, sudah tentu masyarakat Malaysia akan berpindah daripada budaya tidak sesuai kepada budaya yang boleh memaju dan menguatkan negara.

"Sebenarnya, kebolehan kita tidak kurang daripada kebolehan orang lain. Kita sudah buktikan jika kita berusaha, insya-Allah kita boleh mencapai apa saja yang boleh dicapai orang lain."

"Sains dan teknologi, pengurusan, perniagaan dan perusahaan, penciptaan barang canggih, semuanya boleh dilakukan jika seluruh rakyat berusaha. Tetapi jika kita mahu mengubah apa yang menjadi kebiasaan bagi kita kepada yang baru, kebolehan yang dimiliki tidak dapat diuji dan dimanfaatkan," katanya.

Dr Mahathir berkata, walaupun Malaysia aman dan tidak menghadapi banyak masalah seperti kebuluran dan malapetaka besar seperti dihadapi orang lain, rakyat negara ini masih lemah dan mudah ditindas orang lain.

(END)